


TEZAU LITURGIC
4 FEBRUARIE

SLUJBA
SF.PREOT-MUCENIC
NICOLAE
KANDAUROV
DE LA
BARSUKOV



MOSCOVA, 2000



Служба сщмч. Николаю Кандаурову

НА ВЕЛИЦЕЙ ВЕЧЕРНИ

По предначинательном псалме, Блажен муж:
1-й антифон.

На Господи возвах: поставим стихов 8 и
поем стихиры 3 праздника.
И священномученика стихиры 5, глас 2.
Подобен: Егда от Древа:

Егда чете достохвальной/ во благочестии
изрядных Андреа и Анны,/ мужеству и
благодати тезоименных,/ утешение от Бога
послался велие,/ рождшуся ти, досточудне
Николае,/ истинно сии посвящают тя
Господеви,/ да во время свое воспоеши всяким
дыханием/ благодати Подателю и мужества//
хвалы победный глас.

Егда помыслов шатание горькое/ обуяло люди
русския,/ яко и в земли Кубанстей славней
воинами,/ подвиги духа
вернохрабрствующими,/ оскуде служение
духовное,/ ты, богозванне Николае, Исаии
пророку подобяся,/ се аз, послы мя, —/ духом
Господу возопил еси// дерзновения верный
глас.

Егда на Господа и на Христа Его/ ополчишася
богоборнии,/ яко и самей державе
сокрушится,/ и царю и священником и
младенцем незлобивым/ предатися убиению
лютому,/ ты, Николае доблественне, паче
укрепился еси духом,/ да храмы Божии и души
человеческия/ священнолепне возродиши,//
воспевая Христу Царю хвалы победный глас.

Не может град укрытися верху горы стоя,/ не
мощно и человекоубийце диаволу/ обрести
покой среде торжества славы Божия,/ сего ради
пусти Господь скорби Николаю горчайшия,/
яко стрелы разжженные сатанинския зависти:/
изгнание от семьи и паствы, паки и гладную
супруги смерть./ Но и в боли пачеестественней/
не умолкает сего новаго Иова// плачевный
Богови хвалы глас.

Подъемлещи, Николае терпеливнейше,/ якоже
некий Симон Кириней,/ треблаженный, святе,
крест Христов,/ да и чада твоя в нове гладе
напитаеши,/ да и люди новыя укрепиши в
терпении,/ да и душу твою конечно
приуготовиши/ ко всеконечному на земли
истязанию смерти лютыя,/ яже вход ти бысть в
жизнь некончаемую// в нейже в лице
Ангельстем слышимъ есть победный твой глас.

Слава, глас 6:

Сиры не остави ны, отче,/ прииди стани с нами,/ настави, милостиве,/ како всем житием пети Христа// паки и твой любви к Нему подвиг.

И ныне: праздника.

Вход. Прокимен дне и чтения 3.

Пророчества Исаиина чтение:

Обратися от небесе, Господи, и виждь от дому святого Твоего и славы Твоея:/ где есть ревность Твоя и крепость Твоя?/ Где есть множество милости Твоея и щедрот Твоих, яко терпел еси нам, Господи?/ Ты бо еси Отец наш, яко Авраам не уведе нас, и Израиль не позна нас,/ но Ты, Господи, Отец наш, избави ны, яко изначала Имя Твое на нас есть./ Почто уклонил еси нас, Господи, заблудити от пути Твоего?/ Ожесточил еси сердца наша, еже не бояться Тебе?/ Обратися раб Твоих ради, племен ради наследия Твоего./ Да помале наследствуем гору святую Твою./ Противницы наши попраша святыню Твою. Быхом яко от начала, егда не владел еси нами, ниже назвася Имя Твое на нас./ Аще отверзеши небо, трепет примут от Тебе горы и растаются, яко воск от лица огня тает./ И попалит огонь супостаты Твоя, и явлено будет

Имя Твое противным Твоим./ От лица Твоего
языцы возмзутся. Егда сотвориши славная,
трепет примут от Тебе горы./ От века не
слышахом, ниже очи наши видеша Бога, разве
Тебе, и дела Твоя истинна, и сотвориши
терпящим Тя милость./ Срящет бо милость
творящая правду, и пути Твоя помянут./ И
ныне, Господи, Отец наш Ты еси, мы же брение;
и Ты Создатель наш, и дела рук Твоих вси мы./
Не прогневайся на ны, Господи, зело, и да не
помянеши во время грехов наших;/ и ныне
призри, Господи, яко людие Твои вси мы.

Премудрости Соломони чтение:

Праведник аще постигнет скончати, в покои
будет./ Осудит же праведник умирая живущия
нечестивыя;/ узрят бо кончину праведнаго и не
уразумеют, что усоветова о нем, и во что
утверди его Господь:/ приидут бо в помышление
согрешений своих ужасни, и обличит их противу
беззакония их./ Тогда станет в дерзновении
мнозе праведник, пред лицом оскорбивших его
и отметающих труды его./ Видевше же его
смятутся страхом многим, и ужаснутся о
преславном спасении его./ И рекут в себе,
кающесе:/ сей бе, егоже имехом некогда в
посмех и в притчу поношения./ Безумнии,
житие его вменихом неистово, и кончину его

безчестну./ Како вменися в сынех Божиих, и во святых жребий его есть?/ убо заблудихом от пути истиннаго, и правды свет не облиста нам, и солнце не возсия нам./ Беззаконных исполнихомся стезь и погибели, и ходихом стези непроходны,/ пути же Господня не разумехом.

Премудрости Соломони чтение:

Похваляему праведнику, возвеселятся людие:/ безсмертие бо есть память его,/ яко от Господа познавается и от человек,/ и угодна Господеви душа его./ Возлюбите убо, о мужие, мудрость и поживете:/ восхощите ея и наказани будете./ Начало бо ея любви и соблюдение закона./ Почтите премудрость, да во веки царствуете./ Возвещу вам и не скрюю от вас таин Божиих,/ яко Той мудрости Наставник есть, и мудрых Исправитель,/ и всякому смыслу и делу Хитрец./ И всем смыслом научит мудрость,/ есть бо в ней Дух разумен и свят,/ и сияние Света присносущнаго, и образ благодати Божия./ Тая други Божия и пророки устрояет,/ благолепнейши же есть солнца и паче всякаго сотворения звезд,/ свету сосуждаема, обретается первейши./ Тая угождающих ей от болезни избави/ и настави на стези правыя./ Даде им разум имети свят,/ и сохрани я от ловящих, и подвиг крепок подаде им./ Да

разумеют вси, яко сильнейше всего есть
благочестие,/ и никогдаже преможет злоба
мудрости,/ ниже преидет злыя обличающ суд./
Рекоша же в себе, помысливше неправедно:/
насильствуем праведному, и не пощадим
преподобства его,/ ни усраимся седин
старости многолетны./ Будет бо нам крепость
закон/ и уловим праведнаго,/ яко неутоден нам
есть,/ и противится делом нашим, и поносит
нам отпадение закона,/ и обличает нам
согрешения наказания нашего./ Возвещает нам
разум имети Божий,/ и отрока Господня себе
именует./ Бысть нам на обличение помышлений
наших/ и тяжек нам есть и видим,/ яко
неподобно иным житие его, и изменены стези
его./ В поругание вменихомся ему,/ и удаляется
от путей наших, яко от нечистот,/ и блажит
последняя праведных./ Увидим убо, аще словеса
его истинна суть,/ искусим, яже сбываются
ему./ Руганием и мукою истяжем его,/ да
разумеем кротость его и искусим беззлобство
его,/ смертью безобразною осудим его,/ будет
бо посещение от словес его./ Сия помыслиша и
прельстишася, ослепи бо я злоба их,/ и не
разумеша таин Божиих и не разсудиша,/ яко Ты
еси Бог Един, живота имей и смерти власть,/ и
спасаяй во время скорби, и избавляяй от
всякаго зла./ Щедр и милостив, и даяй

преподобным Своим благодать,/ и Своею
мышцею гордым противляйся.

На литии стихиры, глас 7:

Се изгнание скончается,/ во свое гнездо,
Николае, тщишися,/ обретаеши чад
сокрушение,/ гладом лютым изгиблшей
матери,/ вопиющим птенцем
шесточисленным:// не остави ны сиры, отче.

Се служение новое в Белой Руси/ отверзается
скорбию новою,/ разверзающуся гладу
тяжчайшему,/ токмо живу людей милосердию,/
выну тя любовью привечающим —/ кротка
голубя, жертвенна пастыря,/ вопиющим
птенцем шесточисленным:// не остави ны сиры,
отче.

Се на поприще новое преселяеши/ во пределы
земли Луховицкия/ паки светиши людям
Божиим, грееши,/ по реченному благо деяти
тщишися,/ духом зря истязание всеконечное,//
се бо солнце позна запад свой.

Совнимати чад собираеши чтению,/ гласу отчу
внимати сладкому,/ се, увы, конечное видение,/
се, увы, память жизни конечная,/ се внезапно
внити спекулятором,/ разлучити всеконечне
отца и чад,/ убиению того предати лютому,/
некасаемей обаче души мученика,/ возлетающу

того духу в горня, / вопиющим птенцем
безчисленным: // не остави ны сиры, отче.

Слава, глас 3:

Молитвами отеческими, о Николае, / чада твоя
ограждаются, / храмы, идеже память чтится
твоя, / в новом благолепии возстают, / се бо
евангельски светлейше / яко солнце во Царствии
Отца // возсиял еси, святе, в просвещение наше.

И ныне, глас тойже:

Исполняемому обетованию, / лицезрит Симеон
Славу Израиля, / с миром старец от уз
разрешается, / се сияет ему среде смертных
тьмы // во откровение языков Свет.

На стиховне стихиры, глас 2.

Подобен: Доме Евфрафов:

Земле Кубанская, / святовоспитавшая / воинов
— Руси защитников, / чествуй воина
духовного, // Николая священного.

Стих: Праведник яко финикс процветет, / яко
кедр, иже в Ливане, умножится.

Храмы Ставропольския, / словом пастырским
огласившийся, / еже братоубийство пресеци, /
глас прославите дерзновенный сей // Николая
священного.

Стих: Насаждени в дому Господни, / во дворах
Бога нашего процветут.

Соборе новомученик,/ Церкви Русския небесный
личе,/ пой славословеньми/ сладкогласного
пастыря// Николая священного.

Слава, глас и подобен тойже:

Бутово — врата небесная,/
страшнодивновеликая,/ кровию праведничею
священная,/ паки величайтесь подвигом//
Николая священномученика.

И ныне: праздника.

Тропарь, глас 1:

Пастырская свирель сладкогласия твоего/
собирает словесныя овцы/ еже внимати житию
твоему, славне:/ како о благочестии подвиглся
еси,/ како среде гонений храмы возсозидал
еси,/ како претерпел еси скорби лютыя,/ како
душу о Христе положил еси, о Николае,//
сладчайший молитвенниче наш.

НА УТРЕНИ

На Бог Господь: тропарь праздника дважды.

Слава: святаго. И ныне: праздника.

По 1-й стихологии седален, глас 2:

Телесныя исцели страсти,/ тугу душевную
утеши,/ восполни духа оскудение,// не остави
сыры, отче Николае.

Слава, и ныне: праздника.

По 2-й стихологии седален, глас 2:

Веси немощ нашу,/ малодушием
разслабленных,/ веси и озлобление,/ укрепи на
борюция ны,/ / крепкодушне Николае.

Слава, и ныне: праздника.

По полиелеи седален, глас 6:

О священном служении ревнуеши, Нико-лае,/
братоубийство лютое проповедию сечеши,/
храмы воздвизаеши/ и люди собираеши славить
Христа,/ за Негоже кровь твою горячую
лиеши,/ / Емуже и о нас ныне молишися.

Слава, и ныне: праздника.

Прокимен на утрени, глас 4:

Святым, иже суть на земли Его/ удиви Господь
вся хотения Своя в них. **Стих:** Предзрех Господа
предо мною выну,/ яко одесную мене есть, да не
подвижуся.

Евангелие от Матфея, зачало 36.

По 50-м псалме стихира, глас 6:

Святым, иже суть на Руси Святых,/
новомучеником преславным,/ удиви Господь
хотение Свое,/ еже Церковь Русскую возродити/
дерзновенным сих ходатайством,/ сего ради о
уделех своих умоляюще/ Николаю пречудному
возопиим:/ / радуйся, новый
священномучениче.

КАНОН, Глас 4.

**Праздника на 4 и священномученика, егоже
краегранесие сице:**

Воздохни о нас дерзновенне отче Николае.

Песнь 1

Ирмос: Моря чермную пучину/ невлажными
стопами/ древний пешешествовав Израиль,/
крестообразныма Моисеовыма рукама//
Амаликову силу в пустыни победил есть.

Велелепный цвет земли казаческия явился еси,
чудне Николае, от корене прозяб богобоязненна,
паки и храбрострададельческа.

Отеческу наследуя мужеству и боголюбию
матере, от юности избираеши по вся дни жития
теснейший путь евангельский.

Зрелость благочестия от юности, Нико-лае, являл
еси ко всякому труду прилежанием, матере-
вдовы вкупе и сироты-сестры кормильче.

Богородичен: Дщи фараонова пророка и вождя
воспитует, от воды взятаго, Дева же Мариам
ныне в церковь вносит рукою того воды
Разделившего.

Песнь 3

Ирмос: Лук сильных изнеможе,/ и
немоцствующии препоясашася силою,// сего
ради утвердися в Господе сердце мое.

О крепости Николая юнаго, о мужества! Егда
соль обуя, егда устыдишася пастырей сыны
звания священнаго, духовному уче-нию
прилепляется сей, матери премудре
благословляющей.

Христа-Слова послушатель сый, Николае,
изрядным чтением слова Божия к вышнему
служению вкупе и свидетельству о Господе
уготовляеши.

Невесте богоданней жених возрадовася
Николай, Господу радующуся о крестозванном
браце сем, паки же доброплоднем и
венценоснем.

Богородичен: И неслышен хвалы глас
неплодных древле Анны Богу слышимъ и
удобоответен есть, и иныя Анны Прозябение
Чудный Грозд воздает ныне Насадителю твари.

Седален, глас 6:

Смертное осуждение имея в себе апостольски,
Николае, убиения лютаго не убоялся еси, всю
надежду полагая во Христе, мертвыя
возставающим.

Слава, и ныне: праздника.

Песнь 4

Ирмос: Вознесена Тя видящи Церковь на
Кресте,/ Солнце праведное,/ ста в чине своем,/

достойно взывающи:// слава силе Твоей, Господи.

От силы в силу восходит Божиим званием Николай, от законоучения первее ко Стефанову чину, да сподобится во время свое и венца мучеников начальника.

Несть страха Божия пред очима суемудренных, — вопиет Николай, — несть пророка и вождя — се, вмужи мене в пастырстве, Добрый Пастырю, на безплотного противоборца.

Ангели не спеют души мучеников приимати, лютейшему гонению наченшуся, но се вмужается Николай на сокрушение скорое безплотного противоборца.

Сокрушаемым храмом богоборными, сокрушенным паки человеков сердцем, се вмужается Николай на сокрушение скорое безплотного противоборца.

Богородичен: Дщи Фануилева радостотворит люди, присно с ней вселенней радости, Богородице, вопиющей: слава силе Твоей, Господи.

Песнь 5

Ирмос: Ты, Господи мой, Свет в мир пришел еси,/ Свет святыи, обращаи из мрачна неведения// верою воспевающия Тя.

Елицы храмы, в руины претворенныя, вверяшися ти, о Николае, к предней и лучшей лепоте сия возрождад еси.

Разсеянныя овцы любовью собирая свирелию чуднаго пения церковнаго, опустевшия твоя уделы в многолюдны, Николае пастырю, претворял еси.

Знамение благоволения являет Господь на рабе Своем, егда храмы возсозидает славный сей Николай, чада яко Божия мзда воздаются ему.

Богородичен: Неведения Исаиина разрешается мрак боговидением, и мы, Богомати, беззаконий наших свободждаемся причащением Сына Твоего пренебесных Таин.

Песнь 6

Ирмос: Пожру Ти со гласом хваления, Господи, —/ Церковь вопиет Ти,—/ от бесовския крове очищися/ ради милости от ребр Твоих// истекшею кровию.

О трудов Николая пастыря, о мудрости, о долготерпения! Се во всех приключаящихся ему волю зрит Божественную, благую и совершенную.

Восташа и на тя незлобива богоборнии, в веси отдаленней от семьи и паствы разлучают тя. Но во всех сих волю зриши Божест-венную, благую и совершенную.

Елену супругу дивную, гладом изгильшую, возвращаяся, Николае, не обретаеши. Но во всех сих волю зриши Божественную, благоу и совершенную.

Богородичен: Нетленный Един носим Неискусобращней познавается старцем Младенец-Бог, да всего от тли спасет одряхлевшаго грехми человека.

Кондак, глас 3:

Гласу сладчайшему Пастыреначальника,/ еже душу полагати за овцы,/ последовал еси верно, святе Николае,/ усвояся Христу крестоношением,/ даже до смерти за Него подвигся еси,/ взывая непрестанно победным гласом:// с нами Бог и никтоже на ны.

Икос:

Кто, славне Николае, изречет труды твоя и болезни, яко и среде лютых гонений храмы Божии возсозидаеши, пение возрождаеши церковное, люди к житию во Христе привлекаеши, сам же тяжкия скорби и мученическую смерть претерпеваеши. Се бо во всех сих гремит победный твой глас: с нами Бог и никтоже на ны.

Песнь 7

Ирмос: В печи авраамстии отроцы персидстей/
любовию благочестия паче,/ нежели пламенем
опаляеми взываху:// благословен еси в храме
славы Твоея, Господи.

Новый подвиг в пределах Белья Руси отверзает
ти святыи Промысл, да и там среде глада душ и
телес возсияет свет терпеливодущия твоего.

Еже на земли последний удел вверяет ти
Подвигоположник Христос, да исполниши
житием и смертию высокую меру Того возраста.

Отеческое сказание чадом прерывается того
заключением, не могущей прерватися любви,
ныне и во веки царствующей.

Богородичен: Тартара не страшится Симеон, не
убоятся и новомученицы лютости богоборцев,
благословяще, Пресвятая, Сына Твоего в храме
славы Божественныя.

Песнь 8

Ирмос: На Кресте плотию пригвожденнаго/ и
показавшаго нам оружие во спасение,// отроцы
превозносите Христа, Бога нашего, во веки.

Человеконенавидение обрели есте,
проклятейшии, — что суд, что истязания ваша,
— се бо Христос освещает райский ми путь.

Еже жити ми Христос есть и еже умерети
приобретение, сего ради и осуждение смертное

приемлю, яко Божий дар в день рождества
своего.

Ныне рабы Твоя, Владыко, с миром отпускаеши,
— вопиют Николай, Иоанн вкупе и инии
священномученицы, устреляеми
безчеловечными, Ангелы же на небесех
сретаеми.

Богородичен: И Тебе, Мати Чистая, паки
оружие пройде душу, егда зрела еси страдания
новых мученик, во веки Сына Твоего и Тя
славящая.

Песнь 9

Ирмос: Сотвори державу мышцею Своею,/
низложи бо сильныя со престол/ и вознесе
смиренныя Бог Израилев./ В нихже посети нас
Восток с высоты// и направил ны есть на путь
мира.

Кровь горячую излиал еси, боголюбиве, за
Божественный Огнь, человеколюбием сошедший
к нам и пополяющий грехи наша Кровию
Божественною.

О любящих тя воздохни человеколюбием, имже
еще в житии исполнился еси преизлишше,
Николае, по дару Христа Человеколюбца.

Лику небесному приобщился еси, сладкогласне
Николае, и чада приносят посильный ти и

собратиям твоим долг — Бутовский храм
новомученик.

Авраамово недро греет тя, славне Николае, да и
нас сохранит отеческия твоея любви теплота,
ныне убогую ти песнь скончавающих.

Богородичен: Егда славнии новомученицы
воздохнут о нас Богородице, уповаем Тою
спасение улучшить и возопити Благословенней:
Яже о всех благая Мати, слава Тебе.

Светилен:

Се Николай светильник ясен светит —/ се ко
Христу стезя нам расширяется.

Слава, и ныне: праздника.

На хвалитех стихиры, глас 5.

Подобен: Радуйся, Живоносный Кресте:

Радуйся, Николае мудре,/ храмоздателю
искуснейший,/ положивый веру во основание,/
укрепивый паки строение надеждою,/
преукрасивый всяческая любовью,/ да, якоже
Тримифунтским святителем,/ прославится в
плинфе и во всяком дыхании// Троица
Единосущная и Нераздельная.

Радуйся, Николае пребогате,/ богоданныя
таланты умноживый/ труды премногими
неусыпными,/ заповедей хранением
тщательным,/ паки в лишениях

долготерпением,/ ныне же воздаянием
наслаждаешься:/ мерою Божиею
преутрасенною,/ прославляя на лоне
праведничи// Троицу Единосущную и
Нераздельную.

Радуйся, преблаженне отче Николае,/
подражавый отцем великим вселенных:/
Василию твердостию непоколеблемою,/ кротостию
Богослову,/ Златоусту же дерзновенною
ревностию,/ паки терпением изгнания
Афанасию,/ щедродушием Иоанну Милостиву,/
со апостолом в душе вопия чадом твоим://
подражайте ми, якоже и аз Христу.

Радуйся, Николае прехвальне,/ чудным житием
на земли просиявый,/ о часе конца
помышлявый тщательно,/ имже подвиг твой
запечатлевый/ славною кончиною мученика,/
да в вожделенном свете жития вечного/
воспоеши вся Животворящую// Троицу
Единосущную и Нераздельную.

Слава, глас 3:

Воспеваем подвиги твоя,/ величаем
долготерпение,/ любвеобилию дивимся,/
святости образом утешаемся,/ на молитвы твоя
уповаем,/ Николае отче наш,// кровь горячую
за Христа излившаго.

И ныне: праздника.

На литургии блаженны на 8, глас 4:

Стих: Блажени милостивии,/ яко тии помиловани будут.

Восташа и на тя незлобива богоборнии,/ в веси отдаленней от семьи и паствы разлучают тя./ Но во всех сих волю зриши Божественную,// благую и совершенную.

Стих: Блажени чистии сердцем,/ яко тии Бога узрят.

Елену супругу дивную, гладом изгибьшую,/ возвращаяся, Николае, не обретаеши./ Но во всех сих волю зриши Божественную,// благую и совершенную.

Стих: Блажени миротворцы,/ яко тии сынове Божии нарекутся.

Отеческое сказание чадом/ прерывается того заключением,/ не могущей прерватися любви,// ныне и во веки царствующей.

Стих: Блажени изгнани правды ради,/ яко тех есть Царство Небесное.

Человеконенавидение обрели есте, проклятейшии, —/ что суд, что истязания ваша, —// се бо Христос освещает райский ми путь.

Стих: Блажени есте, егда поносят вам, и изженут,/ и рекут всяк зол глагол на вы, лжуще Мене ради.

Еже жити ми Христос есть/ и еже умрети приобретение,/ сего ради и осуждение смертное приемлю, // яко Божий дар в день рождества своего.

Стих: Радуйтесь и веселитесь,/ яко мзда ваша многа на небесех.

Ныне рабы Твоя, Владыко, с миром отпускаеши,
—/ вопиют Николай, Иоанн вкупе и инии священномученицы,/ устреляеми безчеловечными, // Ангелы же на небесех сретаеми.

Слава: Лику небесному приобщился еси,/ сладкогласне Николае,/ и чада приносят посильный ти и собратиям твоим долг — // Бутовский храм новомученик.

И ныне: Егда славнии новомученицы/ воздохнут о нас Богородице,/ уповаем Тою спасение улучшить/ и возопити Благословенней:// Яже о всех благая Мати, слава Тебе.

Прокимен, глас 7:

Тебе ради, Господи,/ умерщвляеми есмы весь день. **Стих:** Вменихомся, якоже овцы заколения.

Апостол к Римляном, зачало 99.

Аллилуиа, глас 4:

Воззваша праведнии, и Господь услыша/ их, и от всех скорбей их избави их. **Стих:** Многи

скорби праведным,/ и от всех их избавит я
Господь.

Евангелие от Луки, зачало 106.

